

richten vnd an sein sunderlich wissen vnd lawbe von vnser erbeit nicht wegzihen, als eczlich in dem vergangen iar gethan, vnnnd des in keine weise vorhalden, das vnser baw der halben nicht gesewmet werde, ist vnser ernste meynung vnd kompt vns von uch zu dancke. Geben zcu Dreßden am sonnabend nach Reminiscere anno domini 2c. LXXX.

Dem rate zcu Dreßdenn vnsern lieben getrawen.

Nach dem Orig. im Rathsarchiv zu Dresden.

No. 141. 1480. 26. Apr.

*Der Rath bittet den Herzog Albrecht um Bestätigung der für dieses Jahr neu gewählten Rathspersonen.*

Irluchter hochgeborner furste, gnediger herre. Vnnsere gehorßame vnderthenige ganntz willige dinste sint uwern fürstlichenn gnaden alzcit bereit. Gnediger herre. Wir habin nach alder gewonheytt uwer gnaden stat Meissen diße nachgeschribene Nickeln Steinbach vff dißes iar zu einem burgermeistere, Nickel Hilwig, Heinrich Hymmelreich, Peter Mager, Mats Ritzsch, Nickel Swertfeger, Hans Schawenbalt, Austen Zcadel, Burghart Grosse, Gregor Berger, Nickel Leman, Andris Edeling zcu ratmanne, biß vff uwer g. gnedige bestetigung vnnnd confirmirunge im besten gekoren vwer furstliche gnade douon als vnnsern g. liben hern zu demutigem vlis bittende, uwer g. wolle dy selbigenn also zu burgermeister vnnnd raten vff dißs jar durch uwer g. briue gnediclichenn bestetigenn vnnnd confirmiren, vweren gnaden burgern allin gemeynlichen gebiten den selbigenn burgermeister vnd ratmanne von wegen uwer g. gefollig vnnnd gehorsam zusein, das wollin wir vmb uwer furstliche gnade in demutigem vlis gehorsam vnnnd ganntz willig sein zuuordinen. Datum am mittwoch noch Marci ewangelistae anno domini 2c. octuagesimo vnder vnserm der stat secret.

Uwer f. g. vnderthenige der rat zu Missen.

Dem irluchten hochgebornen fursten vnd hern herren Albrecht hertzogen zu Sachsßen lantgrauen in Doringen vnnnd marcgrauen zw Meissen vnnserm gnedigenn liebenn herren.

Nach dem Orig. im K. Haupt-Staatsarchiv zu Dresden.

No. 142. 1480. 14. Nov.

*Das Domcapitel verkauft mit Genehmigung des B. Johann seine Besitzungen in Niederfähre in 18 Stücken an 13 Bürger zu Meissen gegen eine bestimmte Kaufsumme und einen jährl. Erbziins.*

Wir Johannes von gotzs gnoden bißchoff zcu Meissen bekennen vor menniglich mit deßem brieffe, das wir vnßern willen gunst vnnnd volstendige macht gegeben haben zcu der vorerbung der Nedirfeher des forburges vor der Elbbrucken zcu Meissen gelegen, in moßen vnnnd formme als vnßer capittel mit den burgern do selbst contractt vnnnd vorschreybung hirnoch folgende begriffen hat. Des zcu rechter vrkunde vnnnd sicherheit haben wir vnßer sigel — vnden an zcu ende an deßen